


रवि शाक्य, इखाछें, यल

खँत्ताः - खँराय व इनाय इयूचः



‘आयू’ यंच

खँत्वाः - खँभाय्
व
छुनाखँ छपुचः

च्वमि
“ज्यापु” पञ्च

पिकाक
नातिवज्ज वज्जाचार्य
दगूबाहाः, भोताहिति, यें

सफूया नां	खँत्वा: - खँभाय् व छुनाखँ छपुच:
च्वमि	“ज्यापु” पञ्च (पञ्च महर्जन)
थाय्बाय्	ओलाछि प्यंग: थां, थाय्मरु, यैं । थौकन्हय् - भुइज:सि ।
पिकाक	नातिवज्र वज्राचार्य, दगूबाहा:, भोताहिति, यैं ।
देब:	शरद शाक्य, ताहाच:, यैं ।
पिदंगु दँ	नेपाल सम्वत् १११८
न्हापां पिदंगु	१००० गू ।
सफूया हामा	च्वमि स्वयं ।
मू	२२। —
कम्प्युटर सेटिङ्ग	कम्प्युटर डिजाइन तथा लेजर प्रिन्ट, माइतिघर ।
थाकू	वाणी अफसेट मुद्रणालय (प्रा.) लि., चल्खु, यैं ।

पिकाकया थःगु खँ

२०४६ सालया जन-आन्दोलन धुंकाः छगू न्हूगु आसा ज्वनाः वःगु बहुदलिय व्यवस्थां नं भीगु मां-भाय् नेपालभाषायात छुं कथंया ठोस उपलब्धि जूगु मदु । अझ धातुं धायेगु हे खःसा थ्व बहुदलिय व्यवस्थाय् नं भीत खस अहंकारवादीतसें क्वत्यलेत स्वयाचवंगु दु । तर नं भीके 'भी नेवाः' धैगु भावना गुलि ब्वलने माःगु खः उलि ब्वलने फयाचवंगु मदु । थ्व धयागु दुःखया खँ जक मखु, छगू विडम्बना नं खः ।

मां-भाय् नेपालभाषा व थ्वया साहित्यप्रति अनुराग दुपिसं थःगु तन, मन व धन बियाःसां मां-भाय् व साहित्यया सेवा याना वयाचवंगु दु ।

थुगु हे इवलय् भी सकस्यां म्हस्यूम्ह मां-भाय् हचमि साहित्यकार भाजु “ज्यापु” पञ्चजुं अतिकं मेहनत यानाः तयार याना दीगु छगू महत्त्वपूर्णगु सफू “खँत्वाः-खँभाय् व छुनाखँ छपुचः” पिथने दयाः जि साप लय्ताः । थुगु सफू पिकाक जुयाः पिथनेगु भाला जितः बियादीगुलिं जि वय्कः प्रति आभारी ।

सफूया छयनं हे सीदु कि भाषा ख्यलय् थुगु सफूया अतिकं महत्त्व दइ । अले थुगु सफुतिं भाषा ब्वमि विद्यार्थी व साधारण ब्वमियात नं यक्व हे ग्वाहालि याइगु खँय् जि विश्वस्त । मां-भाय् नेपाल भाषाया भाषा व साहित्य धुकुती छगू बिस्कं महत्त्व जाःगु ‘मणि’ जुयाः संचय जुयाचवनी ।

सुभाय् !

नातिवज्र वज्राचार्य
दगूबाहाः, भोताहिति, येँ ।

खँत्वाः - खँभाय् व छुनाखँ छपुचः (क)

भिन्तुना !

गुगु जातियाके थःगु हे तजिलजि दयाचवनी, वया थःगु भाय् लिसें मेगु जातियागु स्वयाः बिसकंगु कला व संस्कृति नं दयाचवनी । कला व संस्कृति धयागु वया म्वानाचवंगुया चिं खः । थुकथं म्वानाचवंगु चहःपहः वया खलाबलाया स्वभावय् ल्यहें पुयाचवंगु खने दयाचवनी । लोकबाखं, प्याखं, म्ये, नखःचखः, ब्याक्क इमि जीवन लिसे भ्यलय् पुना च्वनिगु जक मखु, उकें उगु समाज व देय्या न्हाय् नं तयाचवनी । थुपिं गुण थें मनुखं थः थःगु न्हिन्हिसिया जीवनय् छम्हं मेय्म्हसिया दथुइ खलाबला जुइबलय् छुनाखँ व खँत्वाः खँभाय् छयलाः नुगः ब्याका चवनी थःगु च्वजाःगु म्हसीका ब्वयाः । थुकथं भी नेवाः भासय् नं धुवा पत्तिं धया थें छुनाखँ, खँत्वाः व खँभाय् छयलाः थःगु नुगः खँ अभिव्यक्ती ब्वयेगु चलन दु । सुखय् जुइमा, दुखय् जुइमा, छुं नं तप्यंक जक मधासे कलां छायापियाः नं नुगलय् थिइक, न्हचप्पुइ बाँइयाँ मिंक साधारण साधारण खँय् नं छुनाखँ व खँत्वाः- खँभाय् छयलिगु याः । गथेकि, 'नये पित्यात' जक धाःसां गाःथाय्- 'प्वाथय् कँ हाल', 'आतापुति म्वय्म्वय् द्यात', 'आतापुति सुकू चिन' धायेगु यानाचवनी । अथे हे 'व लय्ताल' जक धाःसां गाःथाय् 'वया तुतिं बाँय् मचुल' धकाः थःगु नुगः लिसें थः न्हचःने च्वपिनिगु नुगः नं ब्वयेका क्यना चवनी ।

“ज्यापु” पंच ख ला, नामं ज्यापु कामं नं ज्यापु खः । तर व मेय्पिं थें जाःम्ह ज्यापु मखु । बुँज्या व क्यबज्याय् नं प्राविधिक ज्ञान दयाः ज्याय् पू वम्ह व्यक्ति खः । तर वया थःगु कुलायनि ज्याखँय् पुलांगु प्रविधि जक मखु । थौया न्हूगु युगं हःगु वैज्ञानिक अध्ययन व छयलाबुला गाक्क दु । संगीत पतिइ नं वयाके यक्को दखल दु । अकिं थी थी रागय् दुने छायेपिया च्वंगु लसं जाःगु म्येया राग तालया ज्ञां दु । थःके दुगु ज्ञायात थःके जक लिक्कुंका मतयेगु वया बिचाः । उकिं च्वयाः ब्वनाः अले सुयातं कनाः भीगु संगीतयात म्वाका तयेगु वया बिचाः । वं थम्हं स्यूगु थूगु खँ तःम्ह थें अनुसन्धान कर्तातय्त व विद्याव्रारिधी याःपिन्त बुँज्या व क्यबज्या अले बाजं म्येया बारेय् ग्वाहालि याये धुंकल । तर सुनां सुनां वयागु थःगु सफूया इबलय् न्हचथं बाय् मन्हचथं व जिं मस्यू ।

आः थ्व “ज्यापु” पंचया आःतक भीगु भाषा ख्यलय् खँत्वाः- खँभाय् व छुनाखँ मुनाः सफुतिइ दुमथ्याः मथ्याःगु खँत्वाः - खँभाय् व छुनाखँ मुनाः सफू पिदनां च्वंगु दु ।

खँ थथे खः, थनिं निदँ ति न्हचः “पंच” ज्यापु आशा सफु कुथिइ वल ।

(ख) खँत्वाः - खँभाय् व छुनाखँ छपुचः

आकाभाकाय् धया थें वं धाल - राजदाइ, जिं सत्यमोहन दाइ नं पिथना दीगु “छुनाखँ” सफू व “खँत्वा: व खँभाय्” सफुतिइ दुमथ्या:निगु जक मुना: सफू तयार याना तयागु दु, छक्व: आम्कन च्वंगु सफूत लिसें रुजु याना स्वये मास्ति व: । वं मुना त:गु “छुनाखँ” व “खँत्वा: - खँभाय्” उगु सफुतिइ दुमथ्या:गु हे जुयाच्चन । व थ: हे दंग जुल । अले जित: भाय् व भाय्लचं भिंका बीत इनाप यात । जिं म्हा: मधया । थनं लिपा व सफू पिथनेत सुयाथाय् सुयाथाय् वन जुइ मस्यू । आ: वया: सफू धुकूया थुवा: भाजु नातिवज्र वज्राचार्य पिथने त्यंगु धयागु सिल । जित: साप लय्ता: वल सफू हे न्याये मदया च्वंगु विद्यार्थीतय्त ग्वाहालि जुइगु जुल ।

थ्व सफुतिइ (३३५ गू) खँत्वा: व छुनाखँ खँभाय्त दुथ्याना च्वंगु दु । धात्थें ला किसिं क्वबुइक थजा:गु खँत्वा: - खँभाय् व छुनाखँया धुकू हे दुपिं भी ! अयसां सिंका:मिया स्वाहाने भ्वाथ: । न्हचांगुसां खँय् अप्व: पता: ब्वयेका च्वनेगु स्वया: मू खँ छता न्हचथने - खँत्वा: - खँभाय् व छुनाखँ धयागु भीगु जीवनया ब्वति जूगुलिं थ्व सफुतिइ च्वंगु खँत्वा:त ब्वना स्वये बलय् न्हूगु थें मताइगु स्वाभाविक ख: । तर नं ज्यापु समाजय् न्यना वयाच्चंगु छुनाखँत नासलं लिक्क ब्वया त:गु सकसिनं नाला काये बह: जू ।

“अन्तिं नील: तिनेगु”, “आजु दतले आताआता आजु मदयेवं भाताभाता”, “क:निब्वय् माक: पिवा: तयेगु”, “क्वंचा प्वा: भ्वंचा म्हुतु”, “खापां काका ख्या:” “ख्वकंचा जुयेगु”, “ख्वा: हुयाकथं गल: हुया छ्वयेगु”, “खुं मन: वालं न:”, “गुइमाय्की”, अले मेमेगु । थुपिं खँत्वा: - खँभाय् व छुनाखँ त भी अप्व:सिनं न्यना न्यना थें जूसां मन्यनानिगु ख: । थ्व इवलय् छ्वा: भाय् कथं ज्यला च्वंगु “दलूचा गुथिपा:”, “ग्वाचये न्हि, कय्ताम्बलय् खि” व “प्यं बर: तयेगु” व छुं छुं मेमेगु खँत्वा: - खँभाय् व छुनाखँत थें जा:गु न्ववाये मछिंगु खँत्वा:त दुथ्याना च्वंगु दु ।

“ज्यापु” पंच थौं गल्वंचं कया: लासाय् प्यपुना च्वंगु दु । अयसां थ:गु कृति भीत ब्वयेगुलिइ वया अप्व: च्यूता: । पंच, छन्त धन्य धाये ! छं सुसा: याकनं बांलाये मा !

राजा शाक्य

१९९८ गुंला थ्व १२

खँत्वा: - खँभाय् व छुनाखँ छपुच: (ग)

जिगु छत्वाःचा खँ

पुखौली ज्या बुँज्या हे मूलजगाः कथं ज्या यानावयाचवनाम्ह जि बुँज्या नाप स्वापू दुगु मंकाः ज्या, ब्वला ज्या, ग्वाहालि ज्या आदि कथंया ज्या जक मखसे पोत्या भव्य, सेवा भव्य, बलपुजा भव्य, गुथि आदि कथंया खलः पुचलय् दुथ्याका वयाचवनाम्ह व थुज्वःगु कथंया ज्या याना जुइगु ज्यापुतय् संस्कृति संस्कार हे जुल । थुज्वःगु हे कथंया गुथि, भव्य, ज्याखँय् सकलें मुनीबलय् थीथी कथंया खँलाबल्हा जुइबलय् गनं गनं मचाय्क पिज्वःगु न्हचइपुसे न्हचाइपुसेचवंगु साहित्यिक खँग्वः, उखान टुक्कात लुमंकाः बीसौं वर्ष न्हचवनं निसैं मुंका तयागु खँग्वःत मध्ये गुरु सत्यमोहन जोशीजुं चवयादीगु “खँत्वा व खँभाय्” व “छुनाखँ” सफुतिइ दुगु खँग्वः नाप ज्वःलाका स्वयाः उगु सफुतिइ दुमथ्याःगु खँग्वः जक ल्ययाः थुगु बःचाधंगु सफूया रूप बियागु जुल । थुगु सफुतिइ दुथ्याःगु खँग्वःत मध्ये सच्छिगू खँत्वाः व खँभाय् विश्वभूमि न्हिपतिइ पिदने धुंकूगु दु । थुगु कथंया साहित्यिकं खँग्वःत मुंके फुगु हे सकसिगु ग्वाहालिं खः । उगु हे कथं प्रत्यक्ष व अप्रत्यक्ष रूपं ग्वाहालि ब्यूपिं सकल भाजु / मयजुपिन्त सुभाय् बियाचवना । थुज्वःगु हे साहित्यिक ज्याखँय् तक्थनाः छैं व पारिवारिक ज्याखँय् थातंकयाः ताःलाकेगु व लुदंका बिइगु ज्या याये मफुसां नुगः कय्मकुंसे व कुमचासे थुगु जिगु ज्याय् खने मदय्क स्यल्लाःगु ग्वाहालि बियाचवीपिं जिगु छँया नापं दुपिं जःपिन्त नं दुनुगलं निसैं सुभाय् बियाचवना । थुगु सफूया निम्तिं कम्प्युटर सेटिङ्ग व थायेगु ज्याय् तःधंगु कुतः यानाः इलय् हे सफूया ज्या सिधय्का ब्युगुलि वाणी अफसेट मुद्रणालय (प्रा.) लि. यात नं यक्को यक्को सुभाय् ! सफू पिकाय्गु ज्याय् ग्वाहालि बिया बिज्याःम्ह सफूया पिकाक नातिवज्र वज्राचार्यजुयात नं मुरिं मुरिं सुभाय् ! थुगु सफूया देबःया डिजाइन चवया द्यूम्ह शरद शाक्यजुयात नं यक्व यक्व सुभाय् बियाचवना । थुगु सफूया रूप बियागु पाण्डु लिपि कापिइ भाषा शैलि व ग्रामर द्रंगु स्यंगुयात भिंका बिइगु निम्तिं निजी ज्यायात हे त्वःफिइकाः थःगु अमूल्य ई बियाः दुःखसिया बिज्याःम्ह हनेबहःम्ह दाजु राजा शाक्यजुयात नं कोतिकोति सुभाय् बियाचवना ।

सुभाय् !

ने. सं. १९९८ दिल्लीगा, गथांमुगःचःहे

“ज्यापु” पञ्च

(घ) खँत्वाः - खँभाय् व छुनाखँ छपुचः

थःगु निजी ज्यायात तकं च्यूताः मतसे भुइजःसिइ थ्यंक
धुरुधुरु बिज्यानाः दुःखसियाः सल्हा ब्याकाः प्रेसनाप सम्बन्धित
ज्या व प्रुफ स्वयेगु तकनं थःम्हेसिनं हे यानाः सफू पिकायेगु
ज्याय् तःधंगु कुतः यानाः ज्या पूर्वका बिज्याःम्ह

हनेबहःम्ह
नरेन्द्र मुनि वज्जाचार्य गुरुगुयात
कोतिकोति सुभाय् व साधुवाद !

अबु बुँड हूँ, जि भव्य वने - लज्या मचायेगु ।

धायेन छाःका “अबु बुँड हूँ, जि भव्य वने” धायेथें खँल्हायेत, भचा मछाः
मजूला ?

अन्ति नीलः तिनेगु - सुथय् दनेसातकिं अय्लाः त्वनेगु ।

वयागु खँ ल्हानाः नं ब्याःलाः, वला “अन्ति नीलः तिने” माःम्ह ।

अचाःगलिं दायेकेगु - अचेत यायेगु, अचेत जुइगु ।

(क) बल्लाः धकाः फाँय्फुँइ यानाजुल “अचाःगलिं दायेका”
बिलका ।

(ख) “अचाःगलिं दाये” धुकूम्हसिनं ज्या याना नइ धैगुला सर्गतय् छँ
दनीगु धायेथें खः ।

अःखःबतं लाकेगु - खःथें याःम्ह बाय् सुनां धाल वयात हे दोष बिइगु ।

जस बिइगुला गनःगन भन “अखःबतं लाकेगु” धकाः सा कुमति
तल ।

अंगःसिलिं गयेगु - खुइगु ।

वयात “अंगःसिलिं गयेगु” ज्या यानाजूगुलिं थानाय् कुनेयंकल ।

आजु दतले आताआता, आजु मदयेकाः भाताभाता - इलं मलाकाः

हथाय् चायेगु ।

वयागु बानि हे अथे “आजु दतले आताआता, आजु मदयेकाः भाताभाता”
अले छु ज्या गतिलाइ ।

आतापाता - ज्ञां ब्वलंकाः ज्या यायेमसःगु अवस्था ।

व “आतापाता” मनुखं ज्या गतिलाका नइमखु ।

आगं प्वलेगु - दुबिस्ता उलाक्यनेगु ।

कर्पिनिगु “आगं प्वलेगु” ज्या यायेमज्यू ।

आमकन जा नयाः, थन न्वस्यू वा - आपत्ति कथं हथायेगु अर्थय् ।
उपायस्कं जुसेलि “आमकन जा नयाः, थन न्वस्यू वा” धकाः धया छ्वये
माःका ।

आसांद्याः नसंफाः - जुइत्यंगु ज्या नं मजुसे द्यायेगु ।
लाखा बिइ धुकूम्ह भौमचा श्वानाब्यबल्य् थुगुसिइया ब्याहा “आसांद्याः
नसंफाः” जुलका ।

आजां नयां स्यैला क्यातु - चित्त मभिने, आशाकुति जुये ।
चित्त मभिनाः का जकं काल “आजां नयां स्यैला क्यातु” नयेफतला
फुक्कं ।

आंयायेवं अहंकार थुइकेगु - खाःपाः स्वयाः गर्व थुइकेगु ।
मनुखं “आंयायेवं अहंकार थुइके” फयेकेमाः ।

आंगसा प्वाँय् ल्हाःतय् लाकेगु - थःगु अधिकारय् लाकेगु ।
(क) वंला ककाम्हेसिगु “आंगसा प्वाँय् हे ल्हाःतय् लाका” तःगु दु ।
(ख) मुख्यगु खँ “आंगसा प्वाँय् हे ल्हाःतय् लाके” धुकूसैलि ग्याइगुला
खँ हे मन्त ।

आतुरिइ छ्वालि तुतां - मामुलि खँ तःधंगु ज्या बिइगु अर्थय् ।
चीधं धकाः हेला याये मज्यू “आतुरिइ छ्वालि तुतां” नं तःधंगु
बःब्यू ।

आसाकुति माहाद्यः - लोभि जुयाजुइम्ह ।
सुनां हनाबना तइधकाः उज्वःम्ह “आसाकुति माहाद्यः” यात ।

इ

इमुलिं न्याकेगु - होसय् वयेकेगु ।
वास्ता मयासे चुच्चंम्हेसित “इमुलिं न्याकुसैलि” तिनि भसंक वंकाः
भःभः न्हुल ।

(२) खैत्पाः - खैमाय् व सुनाखँ छपुचः

इपांथिपां मसिइक - तसकं कष्टप्रद ।

(क) हाकुम्ह जक्खुम्ह ताहाः खंबलय् “इपांथिपां मसिइक” बिस्युंवन ।

(ख) ध्यबा तः थाय् कायेल्वःमनाः “इपांथिपां मसिइक” भःन्हुयाः ब्वाय्वने माल ।

इमूचां किसि त्तःथलेगु - पुरुषार्थया ज्या यायेगु ।

पत्याः हे याये थाकुक् “इमूचां किसि त्तःथलेगु” थें ज्या यातनि वंला ।

इलांया धुं भम्ते याइगु - संखां ग्रष्ट जुइगु, ग्याः ल्वचं कइगु ।

छुं हे म्वाःम्ह मनू “इलांया धुं भम्ते यानाः” सित ।

ई घुर्केगु - ल्वःवंकेगु ।

कर्पिनि साक्कभिक नयाजुल धायेवं तुं छु “ई घुर्केगु” बांलाःगु खँ खःला ।

ईचा धालं थःपाखे मरुतः - थः मनूपाखें तिबः मदुगु अर्थय् ।

दुग्यंक् बिचाः यायेमाः, छायाःसा “ईचा धालं थःपाखे मस्वयेक” ज्याखँ याये नं तसकं थाकु ।

ईचा गःपतय् घाना जुइगु - थःथम्हं खतराय् लाका जुइगु ।

थःथम्हं “ईचा गःपतय् घाना जुइम्ह” मनूयात भीसं छुं धायेथाय् हे लँ मदु ।

उ

उन दु, गुण मदु - ख्वाः बांलाःया चाल बांमलाः ।

मनू जुयाः अथे “उन दु, गुण मदु” जुयाजुइ मज्य् ।

उरःनाप त्वाय्चिनेगु - थःगु बुद्धिं थः हे स्यनेगु ।

व चन्दालयात पासा याना जूसा “उरःनाप त्वाय्चिनेगु” थें जुइका छन्त स्वरे ।

उखान कनीम्ह पण्डित सुथांमलाः - खँसः मनू गतिमलाः ।

आमुथे उप्बः हालाजुइ मते “उखान कनीम्ह पण्डित सुथांमलाः” धैगु खँ छं न्यंलाकि मन्यं ।

खँत्वाः - खँभाय् व सुनाखँ छपुचः (३)

कर्पिन्थाय् सभापति, थःगु छैय् छेरापति - विवेक मदुम्ह ।

खँ सयां छुयाय् “कर्पिन्थाय् सभापति, थःगु छैय् छेरापति” जुया जुलका ।

कय्तापूजा न्यायेकेगु - लित्तुलिना छवयेगु ।

तुसिछगः नये धकाः खाःबंम्हेसित “कय्तापूजा न्यायेका” धकाःसा हल ।

कतय् वैयागु मूति - हेलाया भावं च्वछायेगु ।

न्ह्यसुकाय्थात चिरिमामं “कतय् वैयागु मूति” धकाःसा यानातल ।

कर्म व कर्तु चूलायेगु - मखना थें दुःख वा सुख जुइगु ।

(क) भन दुःखम्हेसित “कर्म व कर्तु चूलाः” धायेथें छँया किलाय् हे दुनावल ।

(ख) धेवा बालयात हे हाकनं चिठ्ठां लात “कर्म व कर्तु चूलाः” धैगु श्व हे का ।

कलेचा सिं, मानाचा जाकि - न्हिं खानाः न्हिं नये माःम्ह, चीमि ।

न्हापां तुं ज्याय् होस मयाः, आः “कलेचा सिं, मानाचा जाकि” जुया च्वने मालका ।

कय्गू लायाः पलाः छिइगु - जोखिमपूर्ण ज्या ।

जितः बियातःगु ज्या ला “कय्गू लायाः पलाः छिइगु” थें ज्वःगु धकाःसा जुयाच्वन ।

कथुइ थाइगु - सिधयेके अथें मदु त्वःते अथें मदु, धाये अथें मदु मधाय् अथें मदु, बाम्हे काइगु ।

(क) छः छयूँसे च्वने धुंकल न त्वःते न सिधयेके “कथुइ थाःगु” ज्या धकाःसा जुल ।

(ख) जिलां खँ फुक्कं सिइधुंकल, न कने, न मकने जितः धकाः “कथुइ थाःगु” खँ जुल ।

कय्ता स्वचाके मलायेगु - आत्तुरि जुयेगु ।

कलाःम्ह अस्पतालय् लाःबलय् वया “कय्ता हे स्वचाके मलाक” ब्वाय्जुइ माल ।

कर्पिनि प्यनय् फांगां फायेका जुतलें, थःगु छ्यनय् फांगा

मदु - कर्पिनि च्यूताः नं थः गति मदु ।

आमुथे “कर्पिनि प्यनय् फांगां फायेका जुतलें, थःगु छ्यनय् फांगा मदुगु” ज्या यानाजुयां थःत भिं जुइ ला ?

कर्पिनि छैय् गुभाःजु, थःगु छैय् बेताःजु - कर्पिन्त धयाथें (धाये सः,

याये मसः) थःथाय् यायेम्वाःम्ह ।

ज्या नं सःम्ह खः, खँ नं सःम्ह खः “कर्पिनि छैय् गुभाःजु, थःगु छैय् बेताःजु” जुइगु धाःसा हिसि मदु का ।

कर्पिनि जाव्वय् द्यः नस्वाः- चित्त मभिने ।

थःगु उखेलाः थुखेलाः मदु “कर्पिनि जाव्वय् द्यः नस्वाः” धयां वइत दइला ?

कःकू म्हुतु - असन्तकि ।

थ्व मानि व मानि धकाः हालाच्चनीम्ह “कःकू म्हुतु” यात निं चित्त बुभ्फेयानाछ्व ।

कः नयाः द्यः धक्का तयेगु - भ्वासि चायेगु ।

वयागु बानि हे “कः नयाः द्यः धक्काः तयेगु” ला खःनि ।

कःलि थें धंवाः जुङ्गु - मचाखाचातय्गु दुवालां (पाखें) दुःख सिइगु ।

मचाखाचा चन्दाल जूगुलिं मांबौ “कःलि थें धंवाः जुल” ।

कःनिव्वय् माकः पिवाः तयेगु - थःथम्हं चायेगु, थःथम्हं स्यनेगु ।

वं थःथाय् ज्या याकेत तयातःम्हला “कःनिव्वय् माकः पिवाः तये” थें जुयाच्चन का ।

कासुलारे - खंकं मखंकं काये ।

इज्जत हे मदयेक उपाय्सकं “कासुलाका” जुइमज्यू ।

कान्छिन्ह कलातं खि तःसां नस्वाः - थः यम्हसिनं न्ह्याथे याःसां यइ ।

वं धाःसा न्ह्याक्को ज्या स्यंकूसां न्ववाइमखु, आमु “कान्छिन्ह कलातं खि तःसां नस्वाःगु” खँ ल्हायेमते ।

काकःतुये - लागिमिगि चाये ।

(क) दुःखसियाः याःगु तक ज्या स्यंबल्य् “काकःतुइगु” ला जु हे जुलनि ।

(ख) न्ह्याबलें आमुथे “काकःतुयाः” जुयां जक छन्त सुनानं ग्वाहालि ब्य् वइला ?

कालांकुलुं - आधिकारिक रूपं दुमथ्याःपिं खलः ।

ज्याखँय् धकाः धयागु “कालांकुलुं” तय् पाखें नं यक्को ग्वाहालिया ज्या जू ।

कातिकं लाः, भावं मलाः - कतिलाःसिं गतिमलाः ।

जितः नुगलय् स्याकाः काःगु वइतला “कातिकं लाः, भावं मलाः” मजुइ हे मखु ।

किसिकपाः जुइगु - भाग्य दइगु ।

“किसिकपाः” तय् न्ह्याथाय् वंसां न्ह्यागु याःसां लवः वः ।

किसिया न्हाय्पनय् धोलक थायेगु - छुं असर मजुइगु कथंया ज्या खँ ।

यक्को हालाजुले वइत ला श्व “किसिया न्हाय्पनय् धोलक थाये” थें जक जुइका ।

किसियात फसि न्हययेकेगु - मायाया भाव क्यनाः दुःख बिइगु ।

वंला “किसियात फसि न्हययेकेगु” धकाः सा ज्या यात ।

कुसिं न्याःगु - मामुलिगु ।

(क) छं वइत अपाय्च्चवंक दाःगुला वइत “कुसिं न्याःगु” ति हे मग्यंका ।

(ख) आमु ज्या ला “कुसिं न्याःगु” घालय् वासः पायेथें जुलनि ।

कुतिवाना पलाः - खू कया पलाः (खुत्यां) ।

म्वाःमदुगु ज्या सनाजुल “कुतिवाना पलाः” छिनाजुइ माल ।

कुसाकुतिं कुलेगु - फुफुरे यायेगु ।

म्वाःसां म्वाःसां “कुसाकुतिं कुलाः” दाजुकियायात त्वाका हे बिल का ।

कुल्हाय् कुल्हाय् - ग्याःम्हेसित तिबःबिइगु अर्थय् ।

थःम्हं तुं न्हापा किमि सिक्क छयाये धुंकाः आः “कुल्हाय् कुल्हाय्” धकाः हालाच्चन का, मनू मखुम्ह फइ ।

त्वंचा हां न्याइगु - थ्वं काइगु ।

भ्वय् वंम्ह “क्वंचा हां न्याकावयाः” छैय् जात्रा हे का ।

त्वंचा प्वाः, भ्वंचा म्हुतु - यक्को नये त्वने माःम्ह (फुम्ह) ।

थ्व मनूला “क्वंचा प्वाः, भ्वंचा म्हुतु” हे खःका ।

त्वातुत्वायेगु - अर्ति बुद्धि बिइकथं व्वःबिइगु ।

गपाय्सकं ध्वांधाये, न्ह्याबलें कलाःम्हेसिनं “क्वातुक्वाका” च्वनीगु ।

त्वेंना बसिया न्हिपं त्वपुइगु - सुचुके मफइगु ।

छं यानाच्चंगु दुबिस्ताया ज्याखँ “क्वेंना बसिया न्हिपं त्वपुइगु” थें जुया वनका ।

त्वेय्प्वाः व्हतं एवयेगु - चिवा कायेगु ।

छिमिगु दुबिस्ताया ज्याखँ ला “क्वेय्प्वाः व्हतं स्वया” च्वपिं दु न्है बांलाक होस या ।

त्वेय्कालि गुइगु - सिउ व क्वैय् जक ल्यनेगु ।

गुज्वःगु ल्वय् जूगु धाये वइतला वासलं थि हे मथिल भन भन हे “क्वेय्कालि” जुयावन ।

तर्तय् चुलेगु - तःधंगु परिश्रम यायेगु ।

न्त्याक्को हे “क्वैय् चुलाः” सना जूसां नं नयेबल्य् वहे छम्वाः छप्यय्
सिबय् मेगु छु दु धकाः ।

ख

खैजःसि - खँ सयेका नइम्ह ।

न्त्याथाय् वंसां प्वाः जाः व “खैजःसि” या ।

खँ खँ लाये - मखुगु खँ ल्हाःगु ज्वने ।

उमि खँ ल्हानाच्चंथाय् जि त्वाक्क थ्यंबलय् “खँ खँ लात” का ।

खःप्वाः तियेगु - गोप्य यायेगु ।

उज्वःगु ज्याखँ यायेत धैगु “खःप्वाः तियेगु” सयेकेमाः ।

खि भुजिं - न्ह्यःने लाःथाय् माःगुम्वाःगु खँल्हानाः हाला जुइम्ह ।

“खि भुजिं” थें हालाजुइम्हेसित स्वया जक यइ धकाः ।

खिचायात ला त्वःतकेगु - फाये मफइगु ।

तिपागुलुयात अय्लाः त्वःतके धैगुला “खिचायात ला त्वःतकेगु” धायेथें
जक खः ।

खिउँथाय् गुच्चा कयेकाः नयेगु - ताकं ताकं ज्या यानाः सफल यायेगु ।

धात्थें हे वं “खिउँथाय् गुच्चा कयेकाः नयेगु”, न्ह्याबलें सफल जुइ
ला ?

खि क्वबियाः लाय्क् धन्ना - म्वाःमदुगु पीर ।

थःत छु दइगु धकाः ब्वाय् जुयाच्चंगु व म्वाःसां म्वाःसां “खि क्वबियाः
लाय्क् धन्ना” या ज्या ।

खिखांमुगःया अप्सरा - भ्वासि ।

गातगात खँ उज्वः जुल “खिखांमुगःया अप्सरा” जुइम्वाःल ।

खिफायेबलय् लोता ज्वंके बहःम्ह - ज्यालगय् मजूम्ह, ज्या ख्यले
मदुम्ह ।

व मनूला “खिफायेबलय् लोता ज्वंके बहःम्ह” हे खः का ।

(८) खैत्वाः - खैमाय् व सुनाखँ छपुचः

खिं म्हुकलं मस्यू हिं म्हुकलं मस्यू - मखुथे या:सां मस्यू, ख:थें या:सां मस्यू ।

तसकं हे ध्वां पाकः का व “खिं म्हुकलं मस्यू, हिं म्हुकलं मस्यू” गुज्व:म्ह मन् धाये ।

खिचां मस्यूगु दु:ख सिङ्गु - तसकं दु:ख सिङ्गु ।

म्वा:मदुगु ज्या संजुल “खिचां मस्यूगु दु:ख सिल” मखुला आ: ।

खिचाखिङ्ग अप्पां कयेकां थ:त तुं चिच्चा: व: - अ:ख:बतं लाइगु, अपजस वइगु ।

भन जिं मिलय् यानाबी धयां ला “खिचाखिङ्ग अप्पां कयेकां थ:त तुं चिच्चा: व:” ख:थे याये मत्य:पिं ।

खिचाया न्हिप्यं तप्यंकेगु - मजुइगु ज्या सं जुइगु ।

आमु ज्या ला “खिचाया न्हिप्यं तप्यंकेगु” थें ज्व:गु ज्या धका: सा जुल ।

खिम्हुतु - ज्यूगुं मज्यूगुं खँ ल्हाना जुइम्ह ।

व “खिम्हुतु” यात दुबिस्ताया खँ छुं हे कने मज्यू ।

खापां काका: ख्या: - मर्मय् दिइगु ख्या:, स्याख्या: ।

(क) ख्या: ला ख्या: “खापां काका: नं ख्या:” जुइला ?

(ख) वं लप्पां काका: ख्या: यात, वइत “खापां काका: ख्या:” यानाबिल का, स्वया छु लगेजू ।

खांखिना बिलि - क:घाये मफुपिं ।

अबु छम्ह सीबलय् मस्त फुक्क “खांखिना बिलि” थें जुयावन ।

खुसिङ्ग गा पायेगु - थुइकं चायेकं द्याका च्वनेगु, लापर्वाइ ।

थुगुसिइया लाय् फुक्क सिइकं चायेकं हे “खुसिङ्ग गा पायेगु” थें जुलका छुयाये ।

ख्वताबजि नकेगु - ल्हा: म्हु चिना: दथु पतिंया गौचां दायेगु ।

न्त्याक्को धा:सां खँ मन्यंगुलि तमं “ख्वताबजि नका” हलका ।

ख्वलाचां पुयाजुइगु - अय्ला: त्वनाजुइगु ।

(क) अथे “ख्वलाचां पुयाजुइ” मा:म्हसिगुनं जिउ गतिलाइला ।

(ख) “ख्वलाचां पुया जुइगु” ला वयागु बानि हे जुलनि ।

ख्वकंचा जुयेगु - न्ह्याम्हसिया नापं ल्यूल्यू न्ह्य:न्ह्य: जुइम्ह, थिल कि प्यपुनिगु ।

(क) गपाय्सकं मछा: मजूम्ह धाये आ: “ख्वकंचा हे जुया जुइगु” का स्वरे ।

(ख) भिंगु व ख:गु ज्याखँय् “ख्वकंचा जुइस:सा” न्ह्याथासनं फाइदा काये फइ ।

ख्वा: हुयाखतनं गल: हुयाछ्वयेगु - छगू ज्याइवलं मेमेगु ज्या नं सिधयेकेगु ।

बुराबुरि जंक्व याना: “ख्वा: हुयाखतनं गल: हुया छ्वयेगु” कथंम्हचाय्मचा नं बिया छ्वत ।

ख्वा: बकुलाफेगु - चित्तबुझय् मजुगु भाव व्वयेगु ।

भीसं धैगु खँ न्यना: व ला “ख्वा: बकुलाका” वन ।

ख्वाख्वा त्यायेगु - नुगलय् दिक्क न्वायेगु, तिकक मिंक न्वायेगु ।

वं छगू ज्या स्यंकूबलय् फुक्कसिनं हे “ख्वाख्वा त्यात” ।

ख्वंम्त: जुयेगु - विश्वास मंदयेगु ।

ध्वगिक स्यना: “ख्वंम्त: जुइ” धुंकूम्ह मनूयात सुनां पत्या:याइ ।

खुं मन:, वालं न: - रक्षक हे भक्षक ।

(क) थनला “खुं मन:, वालं न:” जुयाच्चंगु दु ।

(ख) पिवा: तयातयां छुयाय् “खुं मन:, वालं न:” जुसेलि मेगु हे उपाय यायेमाल ।

खेप वनां धन छखे ला:, छँय् वयां कला: छखे ला: - न्ह्यागु या:सां द्याइगु ।

कर्मय् मदुम्हय्सित अथे हे ला ख:नि “खेप वनां धन छखे ला:, छँय् वयां कला: छखे ला:” धायेथें धका: जुल ।

(१०) खँत्वा: - खँभाय् व छुनाखँ छपुव:

खौ त्वयेकागु कवाफ साः - भंगः लायेगु खँ ।

व धाःगु खँ जुइवं हे छु “खौ क्वयेकागु कवाफ साः” धाःसां पत्याः जुया च्वनेगु ला ।

ख्यैय् न्यानाः ह्यैय् फ्वसा - चीधंगु ज्याय् तःधंगु लवः ।

पँय्कालि बनय्ज्या याइपिनि ज्या हे “ख्यैय् न्यानाः ह्यैय् फ्वसा” यायेगु ला खःनि ।

ख्यैय् श्वः माखाचा - लाग्वलं लिनाः धिसिलाःम्ह मिसा ।

वःम्हवःम्ह मछि मचाखाचाया मां जुइ धुंकूसां भन भन हे “ख्यैय् श्वः माखाचा” थें च्वनावलका स्वरे व मिसा ।

ख्याःयात ले ख्याः मचाः, ख्याः धुंकाः छुं मचाः - न्ह्याइपु जक

अप्वः अनुभव यातलें लिपा उकें वइगु दुःख वाः मचाइगु ।

पीर मर्का न्ह्याक्व हे दुसा नं “ख्याः यात ले स्याः मचाः, ख्याः धुंकाः छुं मचाः” थें जुयाच्चंगु दु वयात ।

ग

गसु मलनिगु - सोभित मदयेगु, धंग मदयेगु ।

(क) थः “गसु मलं” कर्पिन्त हिस्याना जुइ ।

(ख) “गसुमलंम्ह” कलाः लानाः भुतुलिइ मि मच्यात ।

गफि - म्वाःमदगु खँ ल्हानाः मनूतय्त लट्ठ याइम्ह ।

व “गफि” यागु खँ न्यनाच्चनां छँय् जा बुइला ।

गथांमुगः ख्वाः - ख्वाःपालं हे ग्यानापुम्ह ।

ख्वाःपाः “गथांमुगः ख्वाः” जूसां मनू भलादमिम्ह खः ।

गंसुवाः गुइगु - भंगः लाना खँ ल्हायेगु ।

फैचा छम्ह उमिसं “गंसुवाः जुयाः” माकुक् हे नयाबिल ।

गुबलें प्याःचाः, गुबलें भूचाः - माःबलय् माःकथं मजुइगु अर्थय् ।

मज्यूगु श्व हे ला खःनि “गुबलें प्याःचाः, गुबलें भूचाः” आः यायेगु छु ?

गुडमाय्की - ग्याफ्रा ।

भीगु न्ह्यःने न्ह्याक्को हे फर्माय् यानाः खँ ल्हाले वं, पिने वनिइबलय्
न्ह्याबलें “गुडमाय्की” जुयावइ ।

गोरागू लुङ्कोगु - अय्लाः कायेगु, मि दुइगु ।

थुगुसिइ भव्य न्याःथे च्वं उमिथाय् छँय् “गोरागू लुङ्का” च्वन ।

गवाचय् न्हि, कय्ताम्बलय् खि - सुद्धि व लगः धगः मदुम्ह ।

थ्व बुरा ला “गवाचय् न्हि, कय्ताम्बलय् खि” हे जुयावन का ।

गवाय् म्वाकोगु - फाइदा यानाः फुई यायेगु, फुरुङ्ग जुइगु, सन्तुष्ट जुइगु ।

दुगछि लवः वःगुलिं वं “गवाय् म्वाकल” ।

गवाचय् चिसवाः वयेकोगु - चुप्पा नयेगु ।

छ्वाः स्वयेबलय् पाकः छ्वाःसां “गवाचय् चिसवाः वय्कः जुइ” माःम्ह
मनू का स्यूला छं ।

गवाय्पिया सुकुध्यां - करपिनि मभिंगु व स्यंगुलिइ हिस्यानाः लय्तायेगु ।

उमिगु ज्या ला स्यन भाइसा “गवाय्पिया सुकुध्यां” ।

गवाहालि यायां छ्वालिप्वाः ज्वनेगु - बेइमान यायेगु ।

ध्वगिक हे स्यन व मनू, पासाम्हेसिनं “गवाहालि यायां छ्वालिप्वाः ज्वनेगु”
ज्या यानाब्यबलय् खत्तम का ।

घ

घलंघलं ल्वः - उथेंउथेंतुं जुइगु अर्थय् ।

छपा तुतिं चीहाःम्हेसित छपाल्हाः चीहाःम्ह भम्चा लासेंलि “घलंघलं ल्वः”
गु जुल मखुला ।

घच्चाः पहः क्यनाः गुछाः नयेगु - कर्पिन्त फवानाः थः कतिलाकेगु ।

मनू म्हेसीका तयाति “घच्चाः पहः क्यनाः गुछाः नयेगु” दाउ वयाके
आःतकं दनि ।

(१२) खँत्वाः - खँमाय् व सुनाखँ छपुवः

घः हिले - नसा नयेयये ।

(क) न्ह्यागु नकूसां ग्वामग्वाम नयेफु गुलिजक “घःह्यगु” धाये ।

(ख) म्हुतुइ “घः हिले” फःसा धकाः न्ह्यागु नःसां साः मसाः धैगु दैमखु ।

घःकू नं कुल नाश जुइगु - थः थःया ल्वापुं थः हे नाश जुइगु ।

वेकारय् थःथः ल्वापु यानाः “घःकू नं कुल नाश जुइ” धैगु बिचाः हे मयाः, स्यन मखुला आः फुक्कं ।

घाँय्म्वःसु द्वैय् नं मि मदं - अभागी ।

(क) दिन मभिन धायेव “घाँय्म्वःसु द्वैय् नं मि मदं” का स्यूला ।

(ख) मज्यूमहेसिया “घाँय्म्वःसु द्वैय् नं मि मदं” छुयाय् ।

घुंकाये - गमक्क च्वने, न्याकुं काये, बराये चाये ।

(क) वया “घुंकायेगु” बानिं यानाः हे पासापिं नाप बायेमाःगु ।

(ख) थिक हे जुलनि “घुं कया” च्वंतलें भ्वय् वने छेलेलात का ।

घ्यः छुकिइ वात कवाफय् - सितिकं मवंकेगु अर्थय् ।

घ्याःत्याःया छुखें “घ्यः छुकिइ वात कवाफय्” जुलका ।

च

चाकु दुथाय् भुजिं - नये दुथाय् म्वःम्वः ।

न्ह्याथासं नं अथे हेला खःनि “चाकु दुथाय् भुजिं” भुनिइगुला स्वाभाविक हे खः ।

चागः ब्वला - थुखें उखे, उखें थुखे यायेगु ।

ज्या छुं हे मदुसां व मचा छम्हेसित “चागः ब्वला” थें यानातःगु जिं ला स्वये हे मफुत ।

चाकु पानाः भुजिं लायेगु - लोभय् फसय् यायेगु ।

“चाकु पानाः भुजिं लायेगु” ज्या यानाच्चंगु धैगु खें सुनानं वाःचायेकूगु हे मखुनि ।

चिम्संप्वाः पतिकं मिखा दुगु - तसकं होसियारी जुइफुगु ।

“चिम्संप्वाः पतिकं मिखा दुम्हेसित” अथें भंगः लाये फइला ?

चिम्सं तितित्स्वाके - ग्याये ।

(क) धायेकं धायेकं याकःचा वन “चिम्सं तितित्स्वाके”माल मखुला छं ?

(ख) वं अनया खँ कंबल्य् जिगु म्ह छम्हं हे “चिम्सं तितित्स्वाना” वल धयां ।

चुंदांया खिति - रतिभर ।

आःला छन्त “चुंदांया खिति” हे बिइ मखुत ।

चवकाबजि काः - पुच्छारम्ह, दकल्य् क्वकालिम्हं ।

हेला यायेमते वइत “चवकाबजि काः” जूसां न्ह्यागु ज्या नं याये सः व ।

चवलां सुये - तापाक च्वंगु क्यने ।

म्हुतुं न्वमवासे “चवलां सुया” च्वन ।

चवजाये धातलें ववळावत - घमण्डिं बांमलाःगु लिच्चः लाइगु अर्थ्य् ।

मनू घमण्डि जुइ मज्य्, खँला “चवजाये धातलें ववळावत” जिल मखुला आः ।

च्यापां चूम्ह बाहाँ र्यायेगु - फाइदा काये धुंकाः नं भंगः लायेगु ।

थः कतिलाके धुंकाः मान्य् ला यात, “च्यापां चूम्ह बाहाँ स्यात का” खनला छं ।

चव्य्चव्य् धाये - जान्या जुये, उप्चये ।

छ मनू धाःसा न्ह्यागु ज्याय् नं “चव्य्चव्य् धाया” जुइ, ज्या स्यन मखुला आः ।

चव्य्वने स्वतलें त्वेकं - धोका नइगु अर्थ्य् ।

चित्त भिंम्ह जूसा धकाः “चव्य्वने स्वतलें त्वेकनकाः” आःतिनि सन्तोष जुइका ।

छगः कपालय् निपु नामलो तयेगु } (थीथी कथंया) तःगु ज्याय् ।
छगू ब्वहलय् निपु न्वः तयेगु } छक्वलं ल्हाः तयेगु ।

(क) “छगः कपालय् निपु नामलो तयाः नं” छंगु ज्या गुबलें गति लाइला ?

(ख) आमु छं ज्या सना जूगु ला “छगू ब्वहलय् निपु न्वः तयेगु” ज्या जुल का ।

छुस्याव्वः मुस्याव्वः - ज्याय् ख्यले मदुपिं

व “छुस्याक्वः मुस्याक्वः” त जकं बथांचिकं दयां छुयाये ।

छेंय् च्वंम्हसित लापाँय्, बुँइ वंम्हसित चापाँय् - अन्याय ।

छ हामा जुया च्वनाः “छेंय् च्वंम्हसित लापाँय्, बुँइ वंम्हसित चापाँय्” यायेमज्य, फुक्कसितं उतिग्यने माः ।

छ्यलां ल्यं, मछ्यलां तं - शिक्षा ज्ञान बिइगु अर्थय् ।

ज्ञान शिक्षा धयागु “छ्यलां ल्यं, मछ्यलां तं” जुइगु वस्तु खः ।

छ्यँनय् पु गाइगु - छ्यँ छगलं सँ तुइगु ।

बुरा मजूनि गथे धाये “छ्यँनय् पुगाये” धुंकल ।

छ्यँनय् न्हुइगु - हेमाति यायेगु, क्वह्यंकेगु, हेपे यायेगु ।

(क) कायनं “छ्यँनय् न्हुइगु” यानाहःगु बौयाके होस हे मदु ।

(ख) स्वैतं “छ्यँनय् न्हुइगु” ज्या बांलाःगु भिंगु ज्या मखु ।

छ्याछःसिं - न्ह्यागुं ज्या खँ स्यंकिइम्ह ।

(क) उज्वःम्ह “छ्याछःसिं” यात बियां नं ल्यना च्वनीला ।

(ख) न्ह्याम्हेसितं हे ल्वाके फु “छ्याछःसिं” हे जुयाच्वन का व ।

छ्वसम् नं जाःप्वाः तिइगु - मामुलि खं तःधंगुयात पनेगु ।

गुबलें गुबलें “छ्वसम् नं जाःप्वाः तिइगु” ज्या नं यायेसयेके माः ।

छ्वय्ला भु लिपा, मू भ्वय् न्हापा - ता:मला:गु ज्या ।

छं हे बिचा: याना स्वरे का “छ्वय्ला भु लिपा, मू भ्वय् न्हापा यानां”
सु मन् चित्त बुझे जुइ ।

छ्वालुयेगु - उप्व: जान्या जुयेगु ।

(क) उप्व: “छ्वालुयेगु” बानि दुपिं मनूत हिसिमदु ।

(ख) थ्व मनूला स्वये हे मास्ते मव: गपाय्सकं “छ्वालुम्ह”
खनीसा ।

ज

जैनुफा: बल्लाके - परिश्रमी जुये ।

ज्या याना: नयेमा:पिं थ:गु “जैनुफा: बल्लाके” फुसा जक सकसिनं
ययेकी ।

जैनुफातय् मिखा ला:गु - इलय् होस मया:गु ।

“जैनुफातय् मिखा ला:गुलिं” तसकं दु:खसिल ।

जाब्ब रुवया: बौ बिइगु - थाय् वा ईयात ल्व: कथं ज्या यायेगु ।

“जाब्ब स्वया: बौ बिइ स:सा” जक न्ह्यागु ज्या नं सुथांलाके फइ ।

जां का:म्ह हँय्चा - नसां का:गु अर्थय् ।

थ:त य:गु खनेवं स्वछा: यागुं छछा: याना: नल “जां का:म्ह हँय्चा” थें
जुयाच्चन का ।

ज्वलं गा:, बलं गा: - स्वाभिमानिया अर्थय् ।

आत्मा गौरवया निम्ति “ज्वलं गा:, बलं गा:” जुइके फयेके मा: ।

भ

भसंक वनेगु - आकाभाकां होसय् वयेगु ।

(क) इकुइकुं न्ह्यलं ब्वाना च्वम्ह “भसंक वंक” मचा च्याँय्क
छ्वयाहल ।

(ख) मतापय् मि कुनाच्चम्ह ला, गा मिन्वःगु खंबलय् “भसंक वनीगु”
जु हे जुलनि ।

भातादायेगु - ख्याः बच्छि नी बच्छि यानाः जबरजस्ती सितिकं कायेगु ।

मनू धुरंधूर चलाखम्ह खः, न्ह्याम्हसिकें हे “भातादायेगु” ज्या
यायेसः ।

भाया जूगु म्हुतु - ज्याय् ख्यले मदुगु खँ म्हुतुप्वाः हे मदिसे प्याराप्यारा हाला
चवनीगु अर्थय् । लाः लाः थें हालेगु ।

(क) न्यने हे यःगु मखुत आमु “भारा जूगु म्हुतु” या खँ ।

(ख) “भारा जूगु म्हुतु” नं खःगु बांलाःगु खँ पिहाँ वइला ?

भू भंगः - त्वाःनाः ताःहाकःम्ह मनू ।

अबु सिकुति काय् “भू भंगः” गपाय्सकं त्वःगु ।

भूचाये - म्ह छम्हं निव्रुक प्याये ।

कुसा ज्वनावने त्वःमन “भूचायेक” वां दाल ।

झ्याईझ्याई हालेगु - थथाय्सकं चुक थ्वयेक ल्वायेथें हालेगु ।

छुं हे धाय्मते न्है वइत “झ्याईझ्याई हालिइगु” वइगु बानि सिइकि ।

झ्वागालय् दुनेगु - कर्पिन्त भिंकेगु ज्यां थः स्यनेगु, आकाभाकां ज्या स्यनेगु ।

विचरा छुयाये ज्या याये धकाः याःगुला खः, थः थम्हं “झ्वाकलय् दुन”
अथे जुइ धकाः सुनां छुस्यू ?

त

ताख्वाँय् - मताःछू याइम्ह ।

उज्वःपिं “ताख्वाँय्” तय्त विश्वास यायेमज्यू ।

तान्वः मचाः, चःति भूचा - दुःख मतायेगु अर्थय् ।

(क) उपाय्सकं जुलं हे “तान्वः मचाः, चःति भूचाः” गुज्वःम्ह मनू
धाय् ।

(ख) “तान्वः मचाः, चःति भूचाःम्ह” धकाः छु थें ज्वःम्ह मनूयात
धाइ का ।

तिपागुलु - थ्वँ अय्ला: खंक्वपतिकं, लुमंकनं त्वनेमा:म्ह ।

थ्व “तिपागुलु” नाप गनं हे वने मज्यू ।

तिछुं दुनेगु - म्ह छम्हं ल: सुलुसुलु वयेक प्याये ।

धलय् कुतुं वना: म्ह छम्हं “तिछुं दुने” थें जुइका वल ।

टुक्रा उस्ताद - पूर्वक म्ये हाले मस:म्ह ।

थ:गु पहलं खूब म्ये हाला जुइमा: “टुक्रा उस्ताद” या ।

त्वरकां - खंसां मखंछू याइम्ह, मस्वयार्थें याना: स्वइम्ह ।

(क) “त्वरकां” जुल का व खंसां नं मखं धाइम्ह ।

(ख) गुलि जक दुश्मन धाये व न्ह्यागु ज्या:या:सां नं “त्वरकां” नं स्वये थें स्वया च्वनी ।

त्वह मामां व: न: जुइगु - निहु ज्वज्वं कतिलाकेगु दाउ ।

आमु छंगु “त्वह मामां व: न: जुइगु” बानि जित: ला मय: का न्है ।

त्वाथय् दायेगु - स्वइगुं फाइदा जुइत्यंगु ज्याय् नोक्सान याना बिइगु अर्थय् ।

बिचरायात नये त्ययेका: “त्वाथय् दाया” बिल गपाय्सकं जक बेमानम्ह मनू धाये ।

थ

थंदे त्वंदे जा:र - नां जाये ।

(क) व छम्ह “थंदे क्वंदे जा:र” म्ह गुरू ख: ।

(ख) वं बेमान याना: नयाजगु खँ “थंदे क्वंदे जा:र” जगु वं थ:म्हेसिन हे चायेके धुंकल ।

थ:गु छ्यनय् किसि प्याखंहूगु मखं, कर्पिनि छ्यनय् सि ब्वाँय्जगु

खँ - थं:गु च्यूता: मतसे कर्पिनिगु खँय् च्यूता: तयेगु ।

थ:गु ज्या जक गतिलाक या, आमु “थ:गु छ्यनय् किसि प्याखंहूगु मखं, कर्पिनिगु छ्यनय् सि ब्वाँय् जगु खंगु” खँ ल्हाना जुइमते ।

(१८) खँत्वा: - खँमाय् व सुनाखँ छपुव:

थःत थम्हं गाः म्हुइगु - थः थम्हं दुःख मालेगु ।

(क) व भिं जुइ मखुत “थःत थम्हं गाः म्हुइगु” धकाःसा ज्या याना च्वन ।

(ख) मुद्दा यायेगु धैगु हे “थःत थम्हं गाः म्हुइगु” ज्या खः ।

थः थाय् आगंचः, कर्पिन्थाय् बहिद्यः - थःगु द्वं सुचुकाः कर्पिनिगु खँ प्रचार याना जुइगु ।

वं छन्हु तःधंगु चोत नइतिनि स्वरे “थः थाय् आगंचः, कर्पिन्थाय् बहिद्यः” जुयाजुइगु बांलाःगु खँ मखु ।

थाकाथुक - कातिकं लाकाकायेगु ।

तताम्ह ब्याहायाना हल केहँम्ह “थाकाथुकु” वल ।

थानापर्सि व्हालांफ्वालां - गसुमलाः ।

छ ला साप हे धंग म्दु का, “थानापर्सि व्हालांफ्वालां” म्ह जुया जुइगु बांलाःलाव ।

थुँक्व प्याइ, पिक्व बुइ - गथेयात अथे हे जुइ ।

न्हापां हे जां दयेकाः ज्या यायेमाः, “थुँक्व प्याइ, पिक्व बुइ” धैगु खँला सि हे स्पूनि ।

द

दम्बिया तपस्या सूर्यःया नामं - व्यर्थगु परिश्रम ।

वं आशा कयाः परिश्रम यानाच्चंगु ला “दम्बिया तपस्या सूर्यःया नामं” थें जक जुइ ।

दथु त्वथ्याःगु - तालय् मलाःगु ।

आमुथे “दथु क्वथ्याक” ज्या यानानं ज्या गतिलाइला ?

दक्को भनं नारां, थःगु छैय् हारां - नियत मभिंम्ह ।

थुज्वःपिं “दक्को भनं नारां, थःगु छैय् हारां” पिनि पाखें तापाक हे च्वनेगु भिं जुइ ।

संज्ञाः - संज्ञाय् व सुनासं छपुवः (१९)

दलूचा गुथि पा: - म्ह्याय् बूगुया मचाबू व्यंकेगु ।

थौ उमिथाय् “दलूचा गुथिपा:” या भव्य न्या: ।

दागिं पला: - दावनी पला:, अमानवी पला:, झ्यातु पला: ।

थौ वया तं पिहाँ व: थें च्वं खंला वं “दागिं पला:” छिना व:गु ।

दिपं दनाव:म्ह - भाजं खा:, हाकुसे गरखेसे खा:व:म्ह मनु ।

उज्व:म्ह “दिपं दनाव:म्ह” थें च्वंम्हेसित गुज्व:म्ह कला: लाइगु जुइ ।

दुसा:की - दुष्ट, मभिंम्ह ।

दक्वसितं स्यंका जुइम्ह उज्व:म्ह “दुसा:की” यात सुनां विश्वास याइ ।

दुग: त्वथुलेगु - ल्हवने हे मजिइक ज्या स्यंका बिइगु ।

(क) आमुथे यात धा:सा “दुग: त्वथुलेगु” ज्या जुइका ।

(ख) बेकारे छुं मस्युम्हेसित “दुग: त्वथुलेगु” ज्या यानाबिल ।

द्यनाच्चंम्ह धुँ थनेगु - ल्व:मंके धुकूगु तंयात उलाबिइगु ।

म्वा:सांम्वा:सां प्यात्त नवाना: “द्यनाच्चंम्ह धुँ थनेगु” ज्या यात छं ।

ध

धर्म धलय् कर्म कालय् - धर्म कर्मय् विश्वास मयायेगु अर्थय् ।

थौकन्हय् जमानाय् “धर्म धलय् कर्म कालय्” जुइ धुकल का स्यूला छिमिसं ।

धनय् कवाज म्हितेगु } थ:म्हं दु:खसिइ म्वां:गु वा थ:गु मेहनत मतूगु धनय्
धनय् लाल कायेगु } मोज यायेगु ।

(क) व “धनय् कवाज म्हिते” दुम्हेसियागु संगत याना जूसा भीपिं नापं स्यना वनीका ।

(ख) स्व भाई जिला व थें “धनय् लाल काये” दुम्ह मनु मखु, छं सि हे स्यू ।

धालखँय् न्यायेगु - सुभबुभ मयासे सुनानं धा:गु खँय् जुइगु ।

अथे “धालखँय् न्याइम्ह” मनुखं नं जस काये फइला ?

(२०) खँत्वा: - खँगाय् व सुनाखँ छपुच:

धिमे यना तःगु - प्वाथय् दइगु (गर्भवती जुइगु)

व मिसा गथे न्यासिवने थाकुचाःगु धकाः च्वनां ला “धिमे स्यना तःगु”
धकाः सा जुयाच्चन ।

धुक् पिने, चुक् दुने - महत्त्वहीन ।

छु ज्यालगय् जुल आमु छंगु “धुकू पिने, चुक् दुने” लाःगु ज्याखँ ।

धेँधेँ बल्लाः - जबरजस्ती, बल्लासही ।

व ला अन “ धेँधेँ बल्लाः” यानाः थ्याकःवंम्ह ला खःनि ।

धौयात भौपिवाः - सिइकं चाय्कं नोक्सान जुइकेगु ।

म्हंचाय्केगु ज्या ला यात “धौयात भौ पिवाः” तयेगु जकं ज्या जुल
का ।

धौबजि नकेगु - ज्यान संकल्पय् लाकेगु ।

वइत ध्यबाया लोभ क्यनाः ज्या याके यंकूगु ला “धौबजि नकेगु” थें जूवंगु
दु ।

ध्यखामाया - वं स्वये वं याइ थें वं स्वये वं याइ थें जुइगु अर्थय् ।

न्ह्यागु ज्याय् नं “ध्यखामाया” अले गनं इलय् ज्या सिधयेके फइ ।

ध्यबा मदु बाउचिया लै न्यायेगु - क्षमतां मचाःगु ज्याय् मिखा तयेगु ।

मफुम्हेसिया आंतयानाः आमु “ध्यबा मदु बाउचिया लै न्यायेगु” खँ
ल्हाःजुइ मते ।

ध्याङ्गो थायेगु - मनय् दुने खुलदुली जुइकेगु ।

पासाम्हेसिनं कमाय्याःगु खंबलय् वयागु मनय् “ध्याङ्गो थात” ।

ध्वाखा धस्त्वाः - पंगः मदुगु ।

छि भायेफइ छिगु निम्ति “ध्वाखा धस्त्वाः” भासँ ।

ध्वाङ्ग्यः - मौकाय् कतिलाके मसःम्ह, चलाख मजूम्ह ।

छँय् थ्यंक वयाः ब्यूवःगु हे मकाइम्ह गुज्वःम्ह “ध्वाङ्ग्यः” धाये श्व
मनू ।

ध्वां - मूर्ख, ग्वाज्यः ।

(क) नःवा धकाः सःतलं हे नःवने मसःम्ह गुज्वःम्ह “ध्वां” धाये श्व मन् ।

(ख) थःम्हं न्ह्यायेगु लाकां हे अःखः न्ह्यःखः मस्यूम्ह गपाय्सकं जक “ध्वां” म्ह धाये ।

ध्वाँय्नाय् - उप्पलं तःधिकःम्ह ।

छुं हे ज्याय्ख्यले मदु, मन् “ध्वाँय्नाय्” जुयां छुयाय् ।

धौया न्यकू घःचुकू तयेगु - संभव मज्जुगु अर्थय् ।

आमु छंगु खँला “धौया न्यकू घःचुकू तयेगु” कथंया खँ जुल का, सु जक पत्याः जुइगु जुइ ।

ध्वंगलय् खा कुनेगु - मूर्ख जुइगु ।

आहा ! “ध्वंगलय् खा कुनेगु” थें खुब बांलाःगु ज्या यात छं ।

न

नमचम यायेगु - छुं हे मखु थें अःपुक नयेगु, अःपुक सिधयेकेगु ।

(क) थुलि ला वं “नमचम यानाः” नयाबिइका ।

(ख) श्वला वं छुं हे मखु थें “नमचम याना” छ्वइका ।

नये नास्ति, प्यनय् सास्ति - म्वाःमदुगु भन्भक्त ।

श्व ज्याय् चाहिं जिं ल्हाःतये मफु, श्व “नये नास्ति, प्यनय् सास्ति” जुइगु ज्या खः ।

नये न ल्हवये - बाम्हय् काये ।

वं धाःगु खँ ज्य धकाः बचं बिइधुन, आः जबलय् जितः “नये न ल्हवये” जुल गुज्वःगु फसाद ।

नसिंगुलु - खंगु तक नयेमाःम्ह, न्ह्याथासं नं नया जुइम्ह ।

श्व “नसिंगुलु” नापं जुइगु ला मछालापुसे हे च्वना वः ।

नयेंचाये - गर्भाशय च्वनीगु अवस्था ।

व माजु जुयाच्चनां छुयाय्, भौमचा “नयेंचाये” धुकल धैगु खँ हे वाः मचाः ।

(२२) खँत्वाः - खँमाय् व छुनाखँ छपुचः

नमाय् जुङ्गु - अत्तेरी जुङ्गु, ह्यामि जुङ्गु, न्ययेके मफुम्ह, छाःम्ह ।

(क) वङ्गु बानि “नमाय् जुङ्गु” हे जितः स्वये मयः ।

(ख) थ्व “नमाय् जुङ्गु” बानि दुपिं मनूतय्त सुनां नं हे काखय् काये फइमखु ।

नफेरेयाये - गाक्क मनके, फुदंक मनके ।

चिरिमांहेसिनं “नकें स्याःगु” लिं हे व मचाया म्ह थाहां वये मफुगु ।

नये सिये - स्वये खने, नये मखने ।

यक्को सम्पत्ति दयां छुयाये, छुं नये ज्यूगु मखु “नयें सिनाः” हे वयागु ज्यू सुथां मलाःगु ।

नासः लुकुंछिना जुङ्गु - हिसि दयेका जुङ्गु ।

कलाकार धैपिसं ला “नासः लुकुंछिना जुङ्गु” यायेमाः ।

नासः छखे लायेगु - हिसि मदयेगु, बिसिद्धि जुङ्गु ।

“नासः छखे लाका” जुङ्गुपिं मनूतय्त गनं हे मानमर्यादा धैगु दइमखु ।

नासः भ्याल्ल लुकुंछिना जुङ्गु - अतिकं बिसिद्धि जुङ्गु ।

बागः मिखां हे स्वये मास्तेमवः थ्व “नासः भ्याल्ललूम्ह” मनूयात ।

नानारंगीया ग्वाचय् जाथाः - सुद्धि मदुम्ह भ्वासि, बराय्चाःम्ह ।

व “नानारंगीया ग्वाचय् जाथाः” म्ह मनू धकाः सुनांजक मस्यू ।

नांगापचिनं प्याखं हुलेगु - इज्जत मदयेक फाइदा कायेगु ।

“नांगापचिनं प्याखं हुलाः” सां वं फाइदा का हे काल ।

नांतये धातले छ्यांतः - तःधंगु ज्या स्यने ।

उलिमछि दुःखसियाः खर्च यानाः याःगु ज्या “नांतये धातलें छ्यांतः”

जुलका छुयाये, तसकं ज्या स्यन ।

नीप्यकु दानाः निलांगु बुङ्गु - अन्त्यय असफल जुङ्गु ।

उलिमछि दुःखसियाः याःगु ज्या “नीप्यकु दानाः निलांगु बुत” गुज्वःगु

भाग्य मदुगु धाये ।

नैक्याः छ्यं - तालु खुइले, सँ हाया वनिगु ।

धायेत ला “नैक्याः छ्यं” मनूत बुद्धिमान जुइ धाइ ।

न्या मसी, कं सी - खनेमदुगु आन्तरिक समस्या ।

सुनां छु स्यू जि ला थौकन्ह्यू “न्या मसी, कं सी” जुयाच्चन कां ।

न्याल्वहं चाःहुइकेगु - दे चाःहुइकेगु ।

व बदमाशयात ला “न्याल्वहं चाःहुइकाः” जात्रा यायेमाः का ।

न्यासैं प्यासैं धायेगु - थौं अय्लाः त्वनाः न्यासि चायेगु ।

भ्वय् वंम्ह थौं “न्यासैं प्यासैं धायेका” बल ।

न्याल्ल ब्याहां यायेगु - भुकय् यायेगु, भंगः लायेगु ।

जितः ला वं “न्याल्ल ब्यां” यायेगु धकाः सा स्वल ।

न्याववय् तापाःगु न्हाय्कनय् खनेगु - मनं खनेगु ।

व मनूला “न्याववय् तापाःगु न्हाय्कनय् खंके” फुम्ह का गुज्वःम्ह खना छं वइत ।

न्ववाक नं हिरा हाः - स्वभाव बचन बांलाये ।

ख्वाः बांमलाःम्ह जूसा नं “न्ववाक नं हिरा हाःम्ह” मनू खः व ।

प

पर्सिम्बलय् प्वःचिङ्गु - भाःत ल्याखय् मतयेगु ।

(क) व बाउचित ला कलाःम्हसिनं “पर्सिम्बलय् प्वःचिना” तयेधुंकल का स्यूला छिमिसं ?

(ख) ल्वापु ज्यनी नं मखुत व “पर्सिम्बलय् प्वःचिना” तये धुंकुम्हसिनं कलाःया खँ अनस्तयानाः मेपिं स्वैगु खँ न्यनी नं मखुत ।

पञ्जलं पिहाँवःम्ह धुँ - पास्याय् मफैम्ह ।

वइत सजायँ ब्यूगुला भन “पञ्जलं पिहाँवःम्ह धुँ” थें धकाःसा जुयावल ।

पैयूकालि बनयूज्या - दलालि ।

“पैयूकालि बनयूज्या” याइपिसं भंगः मलाइ धकाः धायेगु ला भौचां ला
मनः धाये थें खः ।

पाचु छ्य - बरेमनि ।

संकुलि तयाः न्यासिचायाः मिजंमस्त लिस्स्य भुल्य जुया जूगुलिं बौम्हेसिनं
तंपिकयाः म्हेयाय्यात “पाचु छ्य” यानाबिलि ।

पालिं मचुसे ग्वालिं चुइगु - थःत थःम्हं मछिंकेगु ।

जान्या जुयाजूगुलिं “पालिं मचुसे ग्वालिं चुया” जुइमाःगु का
स्यूला छं ?

पायाः पिहाँवयेगु - तमं मि जुइगु ।

उमिथाय् छँय् दाजुम्ह “पायाः पिहाँवःगु” ग्यानापुस्य हे च्वं ।

पाःख वनेगु - सीगु ।

धायेक धायेकं अय्लाः यक्को त्वना जुल “पाःख वन” का ।

पुलिक्वैय् वान्यायेगु - असक्त जुइगु ।

(क) बुराबुरि जुइकाः “पुलिक्वैय् वान्याना” च्वने मालीपिं उज्वःपिं
ला खःनि ।

(ख) काय्पिसं वास्ता मयाः “पुलिक्वैय् वान्यानाः” हे सिनावन का
विचरा बुरा ।

प्यनय् मिं पुयेगु - आपद जुइगु ।

छँ छ्वां किजाया नामय् जूबलय् वइत ला “प्यनय् मिं पुत” का ।

प्यं बन्हः तयेगु - ल्यवःसिं जुइगु ।

फुई यानाजुयां छुयाये “प्यं बन्हः तयाः” नया जूगु सुनां मस्यू धकाः ।

प्यं पुलेगु - बालि पुलेगु, तःसिं पुलेगु ।

थन जक यक्को खने दयां छुयाये “प्यं पुले” बलय् गुलि हे ल्यनी
धकाः ।

प्वनां मचाः, फ्वनां चाः - मायाकाये मत्यःम्ह ।

उज्वःम्हेसित मायाकयां छुयाय् “प्वनां मचाः, प्वनां चाः” म्ह विचित्रम्ह
मन् ।

प्वंघः खनेगु - बेसाइत जुइगु, अलछिन जुइगु ।

सुथय् पिहाँवय्सातकिं “प्वंघः खंगु” ला थौं वनावनाथाय् तक ज्या मजू
का गुज्वःगु बेसाइत धाये ।

प्वार्थनिसें खँ सयेका वःम्ह - बुरानवःम्ह ।

वयानाप नं खँल्हाय्फैला, वला “प्वार्थनिसें हे खँ सयेका वःम्ह”
जुलनि ।

फ

फसं पुइके - च्यूताः मतये ।

का व म्वाःमदुगु खँयात “फसं पुइका” छ्वयाब्यु ।

फसय् लालकायेगु - मू मदयेगु, मजुइगु ज्या यायेगु ।

(क) उज्वःगु ज्या यानाजूसा “फसय् लालकायेगु” जुइका
स्वयाच्च्वंरे छं ।

(ख) ज्यान पानाः ज्या याना जूम्हेसित “फसय् लालकायेका” बिल,
गपाय्सकं गुण मस्यूपिं मनूत ।

फंसि तयनाः, फंसि नकेगु - भंगः लायेगु ।

वला गपाय्सकं नकचरा धाःसा “फंसि क्यनाः, फंसि नकेगु” का ज्या
याःगु ।

फायात समाः याकेगु - सफल मजुइगु, म्वाः मदुगु ज्या ।

वं पूर्वके धकाः सनाच्च्वंगु ज्याःला “फायात समाः याकेगु” थें जक
जुइ ।

फुतिफुतिगेराया मत - सफल मजुइगु आशा ।

छं गुगु आशा यानाच्च्वंगु खः वला “फुतिफुतिगेराया मत” थें जक जुइका
स्वरे ।

(२६) खँत्वाः - खँमाय् व छुनाखँ छपुचः

फेतां चिनाः कय्ता त्वःतेगु - भ्वासिचाः नकचरा जुइगु ।

आमु थे खँ सः धकाः “फेतां चिनाः कय्ता त्वःतेगु” ज्या सना जुइमते न्है छं तःधंगु चोत नइ ।

फ्यलिख्य स्वती - असफल कुतः ।

बिचरा छुयाये कर्मय् हे मदुगु धायेला “फ्यलिख्य स्वती” न्ह्याबलें अथें का व ।

ब

बरेमनिकान्तां जुयेगु - सुचुक सँ खायेगु ।

काशी वनाः “बरेमनिकान्तां जुइक” सँ खानाः भाःतया नामं सराद्ध यानावल ।

बाम्ह सी, बाम्ह म्वाः - तच्चःगु कष्ट ।

बल्लाः धकाः ल्वाःजुल “बाम्ह सी, बाम्ह म्वाः” जुइक जुक्का हल का वइत ।

बागल्य् न्याकाः, स्वंगलय् नयेगु - छगू ज्यां तःगू फाइदा कायेगु ।

थेक्कादार धैपिं “बागल्य् न्याकाः, स्वंगलय् नयेगु” ज्या याइपिला खःनि ।

बाम्ह भ्यलू - सासना जुइगु ।

ह्ययेकाः ह्ययेकाः ब्वनायंकाः “बाम्ह भ्यलुक” धकाः ज्या याकाहल गुलि दया मदुम्ह मनू धाये ।

बाःति हे मवंगु - मू मदुगु, बेकारगु ।

आमु थे “बाःति हे मवंगु” खँ ल्हायेमते ले भाई ।

बुँ तगिं, बजि फ्वगिं - गतिपति मदुगु अर्थय् ।

आयस्ता दु धकाः धायेगु जक का “बुँ तगिं, बजि फ्वगिं” जुयाच्चन का छुयाये ।

बेको मिखा - महीगु अर्थय् ।

वइत मखुगु छुं हे धइगु मदु अय्सां हे जितः वं “बेको मिखां” जक स्वया
जुइगु ।

बेताः द्यः - तःजाः तप्यंमह मनू ।

स्वये हे ग्यानापुसे च्वंमह “बेताः द्यः” बांलूमह मनू खंबलय् जि ला
थारा हे न्हुलका ।

व्यय्पाः व्यय्पाः वयनेगु - मखुथे मखुथे यानाक्यनेगु, अःखतं अःखतं ज्या
यानाक्यनेगु ।

गुपाय्सकं जक चन्दालमह धाःसा श्व, भतीचा तं पिहां वलकिला
“व्यय्पाः व्यय्पाः क्यनेगु” सिबेत छुं हे याइमखु ।

व्वसा मरि, फ्वसा व्हः - ख्वाः बांलाः, चाल बांमलाः ।

(क) बांलाक स्वयाः कायेमाः “व्वसा मरि, फ्वसा व्हः” जुइयः ।

(ख) म्वाःगु च्वछाया जुइ मते, व मनूला “व्वसा मरि, फ्वसा व्हः”
मह का स्यूला छुं ।

व्ववसी भारेयायेगु - न्हाय्कं प्वाचं दायेगु ।

ध्यबा खुयाकाल धकाः काय्महेसित “व्ववसी भारेयाःगु” ग्याना पुसे हे
च्वं ।

भ

भसं मिखा कनेगु - भवय् भवय् कनाः स्वयेगु ।

थःमहं तयागु थाय् ल्वःमंबलय् “भसं मिखा कनाः” भःभः न्हुल ।

भखारि फेता, किसि कय्ता - तसकं ल्हवंमह मनू ।

व मनू गपाय्जक ग्वारा जुयावःगु “भखारि फेता, किसि कय्ता” न्यासि
हे वने थाकुइ धुकल ।

भाजं मिखा - ख्वःसां मिखां ख्वबि मवइगु अर्थय् ।

अबु थें ज्वःमह सितं हे मिखां ख्वबि छफुति पिमज्वःका वया गुज्वःगु “भाजं
मिखा” धाये ।

(२८) खँत्वाः - खँभाय् व छुनाखँ छपुचः

भाःमखनेगु - बरकत मदयेगु, छुं हे याये मफयेगु ।

त्वग्गि जुसैलि छुं हे यायेगु “भाःमखन का” व मनू ।

भाता भाता लिपा, आतापाता न्हापा - न्याचःदंम्ह स्वयाः ग्वाज्यः पाकःम्ह

ज्या वःगु अर्थय् ।

खं जक चलाख जुयां छुयाय् “भाताभाता लिपा, आतापाता न्हापा” कथं

ज्या जुयाच्चवंगु छं बांलाक हे खन नि ।

भुतुलिइ मि मच्याः - नयेगु मदु, नये मखं ।

उमि ग्वःन्हुमछिं दये धुंकल “भुतुलिइ मि मच्याःगु” श्व खँ छं
मस्यूनिला ?

भुतिसः चाःहुइकेगु - दे चाःहुइकेगु ।

व लज्या मदुम्हेसित ला “भुतिसः चाःहुइकाः” सजायँ बिइमाः का ।

भ्यगः तपुलिं पुइकेगु - बेइज्जति यायेगु ।

मामुलि छगू ज्या स्यंकल धाय्वं तुं हे अथे “भ्यगः तपुलिं पुइकेगु” ज्या
यायेज्यू ला ।

भ्वाभः सिमाय् लः बिइगु - सफल मजुइगु ज्याखँय् आस यानाः परिश्रम
यायेगु वा खर्च यायेगु ।

न हे वाये मफये धुंकूम्हेसित वासः याना च्वनेगु ला “भ्वाभः सिमाय् लः
बिइगु” जक जुइ का ।

भ्वाथःगा पाछायेगु - थःम्हं त्वःते धुंगु थःगु मखय् धुंकूगुयात माया याना
जुइगु ।

(क) बिया छ्वये धुंकूम्ह म्ह्याय्मचां थःछँ तःधंका जुइगु धइगु
“भ्वाथःगा पाछायेगु” थें जक खः धाइ ।

(ख) छन्त छु गुलि फाइदा वइ धकाः आमु “भ्वाथःगा पाछायेगु” ज्या
यानाजुयागु ।

मयःमयः त्वाय्चिंके - इच्छा विपरित याके ।

(क) जबरजस्ती व्याहा यानाबिया: “मयः मयः त्वाय्चिंकल” खनी,
दक्कों त्वःता: काय्म्ह बिस्युंवना बिल का ।

(ख) “मयःमयः त्वाय्चिंकां” नं भिं जुइला ।

माकःयात फंसि - थीवं स्यंकिइगु अर्थय् ।

नकतिनि बिया तुरून्त हे स्यंके धुंकल का “माकःयात फंसि” थें का ।

मां नवः, म्ह्याय् फ्वसाव्हः - हजिया दुवालं क्वजिया मभिनेगु ।

इलय् होस मया: आ: “मां नवः, म्ह्याय् फ्वसाव्हः” जुइका च्वने
मालका ।

मांया दुरु त्वनां मगाः, अबुया व्वय् चुचुप्यायेगु - म्वायेकं दुःख
बिइगु ।

थःत कतिलाइगु जक जुइवं तुं हे “मांया दुरु त्वनां मगाः, अबुया व्वय्
चुचुप्यायेगु” ज्या यानाजुइ मज्य् ।

मां भ्वातिं तये छ्वयेगु - स्वार्थी जुइगु ।

आमु थे मतलवि जुया: “मां भ्वातिं तये छ्वयेगु” खँ ल्हायेमते छं ।

मांकाःद्यःया पालिइ लवं कथं सुइगु - अर्थ मदुगु ।

वइत छ्यायेत स्वःगु खं ला “मांकाःद्यःया पालिइ लवं कथं सुइगु” खँ थें
जक जुइ का ।

मां दिक्केगु - अश्लील शब्द न्ववाना: (नांकया:) ब्वःबिइगु, म्हुतु ल्हायेगु ।

थःत मयःम्ह जुइवं अथे “मां दिक्केगु” खँ ल्हाये ज्यूला ?

मिखां नगु पिहां वइगु - तच्चकंया परिश्रम ।

व ज्या यानाबलय् थुलि थाकुल कि “मिखां हे नगु पिहां वल” ।

मिखुंचां ग्वंगः हालिइगु - मिसा उप्वः ज्यान्या जुइगु ।

“मिखुंचा ग्वंगः हालकि” ल्वापु प्वनिइमखु धका: सिइका ति ।

(३०) खँत्वा: - खँभाय् व सुनाखँ छपुच:

मिखा ध्वाखा थें जुइगु - न्ह्यः मवइगु ।

थौं म्ह इकुसे च्वनाच्चन, चच्चिं हे “मिखा ध्वाखा थें जुयाच्चन” छु मतिइ लू, छु मतिइ लू ।

मुलु जुयाः दुहां वनेगु, पा जुयाः पिहां वयेगु - खने मदयेक दुष्मन जुइगु, तिइजक आगं सिइकाः लिपा स्यंकेगु ।

हाकु नुगः धैपिं “मुलु जुयाः दुहां वनेगु, पा जुयाः पिहां वयेगु” ज्याय् खप्पिस जुयाच्चनी ।

मुसमां गफ यायेगु - नये त्वने वास्ता मयासे दुइमदु सुइमदु खँ ल्हायेगु ।

छु “मुसमां गफ याना” च्वनागु थ्व, चुरोस छपुला च्याकि ।

म्ह क्यनाः, दां काइम्ह - फाँय्फुँइ जक यानाः फाइदा काइम्ह ।

“म्ह क्यनाः, दां काइम्ह” मनूयात ज्या ब्यूसा साप तःजि जुइका ।

म्हुतु ल्हायेगु - लाक्व पाक्व धायेगु ।

(क) साप छोत्ताम्ह मनू “म्हुतु ल्हायेत” ला छुं हे मखु थें यायेयः ।

(ख) तंया भौँकय् जुक्क “म्हुतु ल्हाना हल” खनीका वइतला ।

म्हुतु बन्जाःया लाय्तये म्वाः - खँ जक सयेकाः दां म्वाःक बनय्ज्या याइगु अर्थय् ।

वइगु ज्या ला थौँकन्हय् “म्हुतु बन्जाःया लाय्तये म्वाःगु” ज्या यानाच्चंगु दु का स्यूला छं ।

य

यलक्वय् ब्रूगु बकं - मखना थें ब्वलने ।

व मचा स्वरे “यलक्वय् ब्रूगु बकं” थें गुलि याकनं म्ह थाहांवःगु ।

यःम्ह मुलय् मयःम्ह ध्याचलय् - पक्षपाती ।

अथे “यःम्ह मुलय् मयःम्ह ध्याचलय्” याइम्हेसिनं नं सकसितं उति खनीला ?

यःसि गुथि पाः - काय् बूगुया मचाबू ब्यंकेगु ।

उमिथाय् छैय् थौं “यःसिं गुथि पाः” जूगुलिं फुकिजत फुक्कं वयाः म्वःल्ह
वःगु खनीका ।

यातव प्यायेगु - संरक्षण यायेगु, सुरक्षित यायेगु ।

“याक्व प्याना” तःसा धकाः न्ह्यागुं ल्यना च्वनी ।

यानय् मिखा वारेगु - तापाक खंकेगु ।

“यानय् मिखा वाये” फूगुलिं वं न्ह्यागुं खं सिइका कायेफु ।

यांकयाः वान्यायेगु - ताकंताकं खुंलायेगु ।

धार्थे वं “यांकयाः वान्याःगुला” खःम्हसित हे लात का ।

र

राहु पाहाँ सःतेगु - अपजस फयेगु ।

ससःकिजाम्हेसित सःतूगु ला भन “राहु पाहाँ सःतेगु” थें धकाःसा
जुल ।

राहु बाहाँ - पिराहा ।

न्ह्याम्हेसितं हे उलिहे दुःख बिया जुइफु “राहु बाहाँ” हे खः का
थ्वला ।

ल

लखय् दाया कीचा - मामुलिम्ह, ल्याखय् मदुम्ह ।

उज्वःम्ह “लखय् दाया कीचा” छु यायेत माःगु दु ।

लतिं मयः, पतिं मयः - त्यागी, कायेनं मखु यायेनं मखु धाइम्ह ।

दातिम्ह काय् छम्ह “लतिं मयः, पतिं मयः” धकाः दक्को फुक्क त्वःताः
पिहाँ वन ।

लैं तप्यं - पंगः मदुगु ।

छितः सुनानं पनिइमखु भासैं “लैं तप्यं” ।

(३२) खैत्पाः - खैभाय् व सुनाखै छपुचः

लुक्थुक् जुजुं पिलाक्वय् ला थां वः - फजुलग् कष्ट ।

वयागु खँ ल्हानां ब्याःला “लुकुथुकु जुजुं पिलाक्वय् ला थां वःम्ह” मन्,
ज्या यानाः नइम्ह खः धकाः ला व ।

लुँ भंगः - ह्येकाः वा थगय्यानाः कायेदुम्ह ।

“लुँ भंगः” साहु छम्ह दुगुलिं थौकन्हे वया मोज जुयाच्चंगु दु ।

ल्यूने मिखा लायेगु - होस मदयेगु ।

उबलय् वया “ल्यूने मिखा लाःगुलिं” पासाम्हं भंगः लात ।

ल्वहं ढ्रैय् नं मि दं - भाग्यमानी ।

दिन भिम्हसिया “ल्वहं ढ्रैय् नं मि दं” ।

ल्हाः ज्वनाः पतिं नयेगु - विश्वासघातः यायेगु ।

थः मन् धाधां वं ला “ल्हाः ज्वनाः पतिं नयेगु” धकाः सा यात ।

ल्हातय् प्याखं हुइकायेगु - थःगु अधिनय् तयेगु ।

छ लय्ताया ला च्वन, छन्त ला वं “ल्हातय् तयाः प्याखं हुइकातःगु” छं
होस हे मदु ।

ल्ह्वक्केगु - करं पुइकेगु, जबरजस्तिं लितकायेगु ।

वं भंगः लानाः कयातःगु फुक्क “ल्ह्वक्के” मानिका गन त्वःती धकाः
स्वयाच्चरं छ ।

ल्ह्वक्क नकाः मक्क ढायेगु - न्हापां मानय् यानाः लिपा सास्ना बिइगु ।

बइत धयागु ला खःनि पत्याःमजू छुयाय्, आः खंला “ल्ह्वक्क नकाः मक्क
ढायेगु” यानाहल का ।

व

वां तू जाकिं मत् - नइपिं दु, नयेगु मदु ।

(क) “वां तू, जाकिं मत्” जूगुलिं वं तसकं दुःखसिइ माल ।

(ख) न्हापां तूं होस मयाः आः “वां तू, जाकिं मत्” जुलका ।

स्रोत्याः - स्रोमाय् व सुनाखी छपुचः (३३)

वाया पलेसा जाकि सयेकेगु - थका: जुइगु, ज्या मयासे अलसि जुयाजुइगु ।
वइगु खँ ल्हाना: नं ब्या:ला “वाया पलेसा जाकि सयेकेगु” याइम्ह का
व मनू ।

वक्का ततलें नां ल्व:मं - तालय् मला:गु अर्थय् ।
उज्व:म्ह “वाक्का ततलें नां ल्व:मंम्ह” मनूयात खँ स्यना च्वना नं गति
लाइला ?

व:व:पाखें कुसां कुइगु - निख्यधा: जुइगु, न्ह्याम्हेसिगु खँ नाप नं थिक्क मिलय्
यायेगु ।
(क) व “व:व:पाखें कुसां कुइ” स:म्ह मनूनाप खँल्हायेत होस
यायेमा: ।

(ख) थ: बचय् जुयाच्चनेगु ख:सा “व:व:पाखें कुसां कुइ” सयेकेमा: ।

स

सलांत्या - त्वा:ना: ताता:हाक:म्ह ।

मनू “सलांत्या:” जुयां छुयाये ग्व ज्या छुं हे व:गु मखु ।

सपामिचां बजिपौ ल्ह्ययेगु - पत्या: मजुइ कथं ज्या यायेगु ।
मनू स्वयेबलय् अथे च्वं “सपामिचां बजिपौ ल्ह्यये” थें यायेफुम्ह ख: स्पूला
छं ।

सर्ग: फांगा जुये - छें मदये ।

बांलाक होस याना: जक खर्च यानाजु छं, लिपा “सर्ग: फांगा जुइका”
च्वनेमाली ।

सर्ग: स्वया: ई फायेगु - थ:त थम्हं थुकलं बिइगु ।

उज्व:गु कथंया खँ ल्हानाजूसा “सर्ग: स्वया: ई फायेगु” थें ला मजुइ हे
मखु ।

साख्वतय् ताँ छुइगु - चिपला: यायेगु ।

छु याना: पला: छिना च्वनागु व “साख्वतय् ताँ छुइ” मा: थें च्वंक ।

(३४) खँत्वा: - खँभाय् व छुनाखँ छपुच:

साधुया पुचलय् माकः गुरु - ज्या खँ स्यंकूगुया अर्थय् ।

व खँ ला बांलाक हे सिइदु “साधुया पुचलय् माकः गुरु” जूगुलिं फुकसिनं दुःख सिइमाल ।

सैय्प्वाय् छ्वासुकेगु - कमजोरी यायेगु ।

स्वइतं “सैय्प्वाय् छ्वासुकेगु” ज्या याः जुइगु हे पाप खः ।

संन्यापति जुइगु - गंसि जुइगु ।

मस्तय्गु पीरं हे मांम्ह “संन्यापति जुया” वन का बिचरा ।

सांगाया् संगु ल्ययेगु - अल्सि मचायेगु ।

थ्व ज्या ला धात्यों हें “सांगाया् संगु ल्ययेगु” थें धकाःसा जुल ।

सिथि ग्वंगःचा - फुच्चे तिखिम्ह मनू (भाःत) ।

भाःतम्ह “सिथि ग्वंगःचा” जूसानं भम्चा ज्ञानि जुयाच्चन ।

सिन्कां तिक्व - छप्ति, नगन्य ।

(क) छन्त ला “सिन्कां तिक्व” हे वइमखुत आः ।

(ख) “सिन्कां तिक्व” हे मल्यंक सुचुक्क हे नयाबिल का ।

सिकाव्वला - पालपाः ।

छिमिला आमु “सिकाव्वला” धकाःसा जुयाच्चन ।

सीम्ह धुंयात म्वाकेगु - सीकं चायेकं कष्ट फयेगु ।

उज्वःम्ह दुष्टयात ग्वाहालि बिइगु हे “सीम्ह धुंयात म्वाकेगु” थें जूवनी का स्वरे ।

सिँन्हाय् सुइगु - लज्या मचायेगु ।

न्हाय्को धाःसां लज्या मचाःम्ह “सिँन्हाय् छुनातःम्ह” मनू ।

सुकु भत्तु - गनं हे मपूम्ह, थातं मचवनीम्ह ।

उज्वःम्ह “सुकु भत्तु” यात सुनां कताये फइ धकाः ।

सुथांलाके - बांलाके, भिंके ।

अय्लाः गुलुतय्गु जिउ गुबलें हे “सुथांलाके” फइमखु ।

सुपिंखा जुये - हथाय् मचाये, प्यानुये ।

(क) आमुथे “सुपिंखा जुइगु” बानिं हापु छखेलाइ का ।

(ख) बौम्ह “सुपिंखा जुया” च्वंसा काय्म्ह तसकं चतपताःसिं ।

सुं ज्यानाः धिके नं भुनेगु - जसतस यायेगु ।

अथे “सुं ज्यानाः धिके नं भुनेगु” ज्या यानां ग्वःनु जक ज्या बिइगु खः,
मस्यु ।

स्यना भतु - धाःधाः थें धाइम्ह वा याइम्ह ।

भीसं धइ थें गन याइ धकाः वं, वला साहुया “स्यना भतु” हे जुयाच्चंगु
दु ।

स्वये साधु, सँय् व्वातु - सीमदयेक चन्दालम्ह ।

वइत सतिके मज्यु न्है “स्वये साधु, सँय् व्वातु” म्ह मनु धकाः म्हसिइका
तयाति ।

स्वक्कं फछि ब्यकुंच्यायेगु - बुरि जुइगु अर्थय् ।

मिसा धयापिं विश्वास मदु “स्वक्कं फछि ब्यकुंच्याये” फतले पँय्न् वनेयः
धाइ ।

स्यू व त्वँय् जक्क जुये - तसकं गंसि जुये, हड्डी जुये ।

मनु म्हसिइके हे थाकुक्क “स्यू व त्वँय् जक जुइ” धुंकल ।

स्वये स्वरां, नय् गुरां - पाकः ख्वालं कतिलाके सःम्ह ।

मनु म्हसिइका तयेमाः न्है “स्वये स्वरां, नये गुरां” म्ह मनु व, होस
या ।

स्वये खं, नये मखं - आशां धाये ।

दुःखसियाम्ह जि, जि हे तुं “स्वये खं, नये मखं” जुल ।

स्वेप्यूलिसे जायावः - स्यंकेगु स्वःलिसे भिनावः ।

कर्मय् दुपिन्त धैगु स्यंके फइमखु “स्वेप्यूलिसे जायावइ” स्यूला छं ।

स्वँ नाः त्वपुलां - स्वाँय्ल्वचं ग्रस्तम्ह ।

व मनु नं ज्या यानानये गातका “स्वँ नाः त्वपुलां” नं छु ज्यायाइ ।

(३६) स्त्रीत्वाः - स्त्रीभाय् व सुनास्त्री छपुचः

स्वमा गलः घायेगु - थ्वंगुलु जुइगु ।

बुरा जुइधुंकाः नं “स्वमा गलः घायेगु” ज्या याना नं गति लाइ ला ।

ह

हलू गुइगु - न्ह्याम्हनाप नं मिलय् जुइगु ।

व मनू थलि चलाख कि “हलू ज्या जुइत” ला पास का ।

हाकुगुं पुलेगु - बेपत्ता जुइक वनेगु ।

(क) दुःख जुल धकाः “हाकुगुं पुलेगु” बिचाः यायेमते ।

(ख) चन्दाल जुयाजुजुं “हाकुगुं हे पुलाः” बेपत्ता जुइक वन ।

हायेम्बः पाहाँ - सुनानं मसःतूसां मछाःमजुसे वनीम्ह ।

(क) “हाय्म्बः पाहाँ” जुयाजुसैलि हेला मयाइला ।

(ख) दुःख जुल धायेवंतुं “हाय्म्बः पाहाँ” जुयाजुइगु बांमलाः ।

हाप्पलय् कुतिकुति सनेगु - थःगु बुद्धि थःम्हं हे कसा नयेगु, हारांम्हेसित जिस्कय् यायेगु ।

(क) माःगु ज्या ला व “हाप्पलय् कुतिकुति सनेगु” थःम्हं हे कसा नल मखुला आः ।

(ख) मनूया बानि सिइकसिइक नं “हाप्पलय् कुतिकुति सनेगु” ज्या याः जुल, कसा नलका छु ।

हाकुमुस्या तुयूमुस्या दार् - ल्वापु याकेगु, ल्वाकेगु ।

सु बल्लाइ थें स्वयेका का “हाकुमुस्या तुयूमुस्या दार्” ।

हँय्चा जां कायेकोगु - प्वाथय् मन्ह्यंक नयाः वाथावाथा वनेगु ।

नल मखुला लुदंक “हँय्चा जां काःगु” थें जुलका आः ।

हां मां छुसि - छुं हे मल्यंकेगु अर्थय् ।

(क) अथे “हां मां छुसि” याइम्ह नं गतिलाइ ला ।

(ख) उलिमछि सम्पत्ति “हां मां छुसि” यानाः हे फुकल का वं ।

हिंकाः बिलि - भवे भवे कनाजुइगु अर्थय् ।

छुं निगति खँ जुलकि ला “हिंकाः बिलि” थें सनाजुल ।

हुतांचा नकेगु - तमं पितिना छ्वयेगु ।

छु मखुगु ज्या यात थें वइत “हुतांचा नका” छ्वतका ।

हू वये - भाकाभुकु वें जुये ।

(क) कलाःम्ह पँयनं वंसांनिसें “हू वयेका” जुल व ।

(ख) “हू वइपिं” मनूतय्गु विश्वास याये मज्यू ।

न्हाय्पनय् स्वां पुङ्गु - चुकलि यायेगु ।

जि नाप त्वाकेत वइत “न्हायपनय् स्वां पुयाहःगु” धैगु खँ बांलाक हे सिइदत ।

न्हाय्कं भाः व च्वाकं भाः - सदां दुःख कष्ट जुइगु अर्थय् ।

थ्व जीवनय् न्ह्याथाय् वंसां “न्हाय्कं भाः व च्वाकं भाः” सिबे मेगु छुं मदु ।

न्हाय्कं भालं पने मफु, तुकं भालं पनेफु - हारां स्वयाः निर्दाम्ह बल्लाइगु अर्थय् ।

बुद्धि धैगु अथेका स्व “न्हाय्कं भालं पने मफु, तुकं भालं पनाबिलका” खन ला छं ।

न्ह्येंछुयेगु - ह्यामि पहः पिकयाः तेरय् मयायेगु ।

(क) मचाबलय् छ्यनय् छुनातल आः “न्ह्यें छुइगु” यातका ।

(ख) “न्ह्येछूपिं” मस्तय्सं सुखला गुबलें हे बिइमखु ।

ल्हाः व त्वाः चूलाकेगु - नसा चूलाकेगु ।

दुःखसियाः न्ह्याःम्हाः मदयेक ज्या सना जुलं ला थन “ल्हाः व त्वाः चूलाके” थाकुइ धुंकल ।

ल्हाः हुसुलुं, प्वाः फुसुलुं - ज्या नं मदु, नसा नं मदु ।

अल्सिपिं मनूतय् अथे हे ला खःनि “ल्हाः हुसुलुं, प्वाः फुसुलुं” ।

म्ह्याय्मचा न्वानाः भौमचा सेखय् यायेगु - थः न्वानाः कतः कः
घायेगु ।

“म्ह्याय्मचा न्वानाः भौमचा सेखय् याये” सःसा जक समाजय् मिलय्
यायेफइ ।

ह्यंग्वाः नःम्हं हाकुक् खिफाइ - मति मभिंम्हं भिंगुज्या याइमखु ।

वइगु विश्वासय् च्वनेमते न्है “ह्यंग्वाः नःम्हं हाकुक् खिफाइ” धैगु ला
छं सि हे स्यू ।

ह्याकुला स्यायेगु - फाइदा कायेगु, मोज यायेगु ।

(क) उज्वःगु “ह्याकुला स्याये” दइगु ज्याय् सु जक लिचिली
धकाः ।

(ख) मौका छगू ला “ह्याकुला स्यायेगु” हे वलनि का मोज या ।

ह्याकुला मिचय् यायेगु - अत्तेरी हेपाहा व्यवहार यायेगु ।

मायां छुं मधासे च्वंच्वनां ला थ्वं भनभन हे “ह्याकुलां मिचय् यायेगु”
धकाःसा यानाहल ।

ह्युह्युव्युव्यु इकु - प्रयास याःलिसे असफल जुइगु अर्थय् ।

व यानां जिइला थ्व यानां जिइला, न्ह्याक्को सनाजूसां “ह्युह्युक्कु
इकु” जक जुल ।

व्हगं नाय्खिं - खँ भ्वाथःम्ह, ज्यूगुं मज्यूगुं खँ प्रचार याः जुइम्ह ।

उज्वःम्ह “व्हगं नाय्खिं” यात म्वाःसां म्वाःसां छाय् खँ कं जुइ
माःगु ?

व्हगं त्वाःचाय् लः फयेगु - वः खनेदु, वं खनेमदु ।

हिचःतिया कमाइ धैगु “व्हगं त्वाःचाय् लः फयेगु” थें जुइके मज्यू ।



चवमि म्हसीके

नां "ज्यापु" पञ्च (पञ्च महर्जन)

थाय्बाय् : ओलाछि प्यंगः थां, थाय्मरु
थौकन्हय् - भुइजःसि

लजगाः : बुँज्या (वागवानी सम्बन्धि)
थौकन्हय् - बनेज्या

मानव जातिया जीवन लँपुया विकास गनथासं निसें न्हचाइ व गनथाय्
थ्यंकाः पूवनी धैगु खँ अनुमान तक नं याये मफइगु खःसां नं प्रत्येक चेतनशील
मनू जीवन लँपुइ न्हचाः मवंसे पगाःगु छगू प्रकृतिया नियम खः । थुज्वःगु हे
नियमया दुने समाजनाप ह्वनाः वयाच्वंगु मध्यम वर्गय् पुर्खानिसें हे आखःग्वः
छु खः धैगु सिइके मफुपिनिगु कुलय् दंवयाम्ह जि कुलानि ज्या बुँज्या हे थःगु
मू लजगाः यानावयाच्वनाम्ह खःसा नं हिलावनाच्वंगु इलं ब्यू थें आखः सयेकेगु
व छुं छुं ज्ञान शिक्षा प्राप्त यायेगु सौभाग्य जितः नं प्राप्त जुल । थःगु लजगाःया
नापनापं अध्ययन व अनुभव यायां वनेफत । उगु कथंया अध्ययनया सिलसिलाय्
जूगु परिश्रम व मेहेनतया फल प्राप्त जूगु थौं अनुभव यानाच्वना । गुगु फलयात
थौं सकसिगु न्हचोने ब्वये हये फुगु हे जिगु अहोभाग्य कथं थुइकाच्वना । उगु
फलया रस सकसिगु निम्ति यःगु व त्वःगु जुइमा धकाः आसा यानाच्वना ।
सुभाय् !

“ज्यापु” पञ्च